



12354

世經堂集卷之十七

墓誌銘三

明故資政大夫總督湖廣川貴軍務都察院
右都御史贈太子少保謚襄惠淨峯張公

墓誌銘

公諱岳字維喬號淨峯其先蓋出黃帝之後少昊氏
有子曰揮能制弓矢教民帝賴其用命爲弓正而封
之尹城賜姓曰張其後世子孫益蕃代有顯者漢留
侯良晉司空華唐文獻公九齡其尤著者也五代時
始自曲江遷閩之惠安入 明有爲桐廬丞諱茂者

世經堂集

卷十七

一

公會大父也祖諱綸萍鄉令考諱慎英德令自萍鄉
至英德皆有文行以公貴贈都察院右副都御史母
鄭氏贈淑人公生而室有光桐廬異之曰是必亢吾
宗名之岳岳大名也及長端凝不爲羣兒戲好學不
勸遂博極羣書弱冠試于鄉其所對策書紙背盡滿
主司大奇之擢置第一舉正德丁丑進士授行人

武皇帝寢疾豹房獨宦者數人侍公上疏請令大臣
臺諫朝夕起居不報寧庶人謀逆聲播遠近

上將南巡中外洶洶諫者數十輩已前繫詔獄公復
率其僚切諫

上怒杖闕下旣而釋之調南京國子監學正

今皇帝卽位盡還

武廟時諫者官復以公爲行人居久之遷司副尋擢南京武選員外祠祭郎中丁祖母憂服闋補主客郎中由主客出爲廣西提學僉事復改江西坐廣西所貢士廷試黜落七人貶廣東提舉初公爲主客大宗伯與執政議禘禮不合執政知其出於公也忌之然未有以罪至是乃貶云甲午午起知廉州始教民田而嚴盜珠之禁民以不溺死改建學宮選其俊髦親爲講授廉用得去荒陋齒中州安南以亂久不克貢

世經堂集

卷十七

二

朝議將討之公疏言遠夷相攻殺不足爲出兵勞弊中國旣不報則遂治兵食立營堡計王師所從入水陸道里之詳事有緒矣會滿三載擢浙江提學副使尋擢布政司叅政以方有事安南調廣東至則莫福海已款鎮南關乞降公爲督府畫所以受降之策甚備安南平詔賜金幣陞俸一級是年秋督府檄征崖黎涉海南攻羅活抱萬抱宥諸洞破之再賜金幣陞俸一級於是

天子以公果可大用壬寅拜僉都御史巡撫鄖陽改江西江西饑公疏留當輪京師銀五萬兩又請折正

兌改兌米數十萬石民饑而不傷乙巳擢副都御史
總督兩廣軍務徃僮數寇廣右公旣久在兩廣熟知
其山川險易與僮之情僞至則以兵討會封文德文
滑腦諸巢平之遷兵部右侍郎 賜銀幣明年平融
懷遠諸僮進攻馬鞍魚窩平之又陞俸一級 賜銀
幣召爲刑部侍郎御史奏留不果行又明年平連山
僮兩廣無事復 召爲兵部侍郎尋以前後平僮賊
功擢右都御史總督湖廣川貴軍務先時湖之麻陽
鎮算貴之銅仁諸苗叛當事者僥倖苟安曲意爲撫
由是貴苗益肆而湖苗亦且伺釁以動公旣開府于

沅聚錢穀飭戎伍易將帥之不足任者下令爲征勦
計而 朝廷方議撫守二策公力言其非 詔報可
苗始大恐然猶欲藉口於撫以逭誅乃放兵四出寇
印江寇石阡寇思恩幸 朝廷以失利去公而罷兵
詔書切責最後奪一官以激之而公用兵愈急以計
獲其內調田應朝斃諸獄集土漢兵九萬二千有奇
檄諸將分道進勦前後斬獲以數千計其頗逃匿山
箐悉諭降之苗旣衰破震懾其黨皆自分必得相繼
擒首惡龍許保吳黑苗以獻三方遂寧功未及奏而
公卒前數月有大星隕西南公曰我當應之至是果

卒卒之三年本兵覈上其功

上復公右都御史贈太子少保謚襄惠蔭子 賜祭
葬皆從中降蓋特典也公生於弘治壬子十月四日
卒於嘉靖壬子十二月二十四日享年六十有一配
陳氏封淑人綜理內政與公合德後二年亦卒子三
宓太學生娶黃大叅潤女寓官生娶洪御史庭柱女
宿幼女一適庠生李忱孫男女各一公識遠器弘平
居寡言笑天性孝友篤於人倫其學宗宋大儒程朱
曰程朱之言如著龜神明不可忽也故其教學者必
以持敬窮理反躬實踐爲務而凡談說性命一切指

以爲籠罩揣摩毅然排之而不顧一時賢智之士亦
莫能屈焉歷官風采毅然不爲身計利害時宰將以
事罪公士由廣西貢者相約毋就試公適在京師強
之曰若輩涉萬里以求升斗之祿奈何以吾故乃爾
及試公果坐落職亦無幾微見顏面公始以文章氣
節著名及交南用兵更推有將帥之略雖蠻夷亦聞
其威名莫福海將入款謂其人曰向廉州太守安在
也然是時邊臣爲自全計競餽遺用事者公獨不通
一書故每用兵有功常薄其賞微失利輒被譴賴

天子明聖卒能以功名終兩廣沅皆立祠以祀鄉人

亦祀諸學嗚呼公可爲一代之名臣矣公所著有惠
安誌古文要典三禮經傳宋元名輔事業宋名臣奏
議載道集大儒文集聖賢正傳歷代兵鑑恭敬大訓
小山類稿凡若干卷藏于家皆有補於世教云公弟
戶部主事峯率宓等以其月日葬公許山而乞銘于
予予故與公爲道義交而兄事焉乃爲銘曰

張始受氏以弓正封植固而蕃赫赫厥宗旣振文譽
亦繼武功良籌垓下華定江東曲江策叛聿稱遺忠
矯矯襄惠克配於先三已無愠百鍊彌堅俎豆揖讓
文教屢宣帷幄笑談決勝萬全有頑不庭王師四征

世經堂集

卷十七

五

業

或偏或專功罔不成黎患旣息蠻寇亦平蠹茲鬼方
三年弗克有謀盈庭宜撫以德公曰無庸誓滅此賊
蠻方言言王旅翼翼采入其阻殪戎糾忒公始視師
衆論謂危惟

皇之斷信任弗疑公之旣沒寇亂始夷惟

皇之仁褒錄弗遺旣多受祉生榮死哀刻銘幽墟以
勸于來

明故前監察御史蒙泉包君墓誌銘

嘉靖丙午蒙泉包君以侍御謫戍莊浪後三年厥妣
楊太孺人卒于家君痛其生之弗能養也疾之弗獲

侍也歿之弗克奉以葬也窮晝夜哭泣比卒喪衰經
不去體又五年弟侍御吳石繼卒君拊膺號曰誰代
我奉時祀者於是哭益悲竟以是得疾歲丙辰六月
二十八日卒於戍所年五十一初君生五歲而孤太
孺人身教養之勤苦備至及嘉靖壬辰乙未君與吳
石接踵舉進士君以東昌推官徵入北臺而吳石自
中書舍人爲南御史太孺人則已向衰君之按滇還
也將上疏乞侍養會吳石以終養得請太孺人恚曰
教子者獨爲身謀不思爲國家用耶君不得已入

朝未幾奉

命按湖南劾中貴人不法若干事爲所

誣構得罪當死

天子憐而活之故君之赴莊浪雖甚危苦未始有不
平色其所居頽垣敗屋不蔽風雨而君處之甚安獨
以太孺人故悲傷蚤殞謝雖於君爲不幸然亦足以
觀忠孝之大節矣君爲人慷慨雋爽口所欲言不顧
其人之忤於色心所欲爲不計其身之及於難嘗清
戎福建出按滇南鎮守世臣悚然爲君降禮而貪墨
之吏望風解印綬以去至湖南先聲所被莫不震疊
一時稱真御史者必歸君然君亦以是不見容又無

財足以自救其卒也棺殮之費皆出西寧兵備大梁

孟君准孟蓋素與君以意氣相許者也君諱節字元
達別號蒙泉其先嘉與人曾祖俊贈南京禮部郎中
祖鼎與其弟鼐同舉成化戊戌進士官至池州太守
父志贅曹涇楊氏君遂占籍華亭領應天鄉薦以起
子三人長杞次梓季梗杞梗皆國子生梓邑庠生孫
男二兆祥兆隆女三長適國子生屠仲行餘尚幼往
年梗陸走八千里省君莊浪會君聞倭奴寇曹涇遣
還視太孺人塚行未抵家而君卒杞梓聞訃相與迎
君喪歸卜以丁巳年十二月十八日葬于龍居菴東
之新塋於是梗奉孟君狀走京師求予銘且曰吾先
世經堂集

卷十七

七

宋

子所著有苑詩類選西戍北逮錄通考意抄二十一
史意抄釋疑錄渥中稿合若干卷梗兄弟將刻以傳
嗚呼梗之兄弟庶幾能致其孝於君矣予故與君遊
而予孫女又許嫁吳石之子漸林乃銘曰

物忌剛毀亦恥巧完以身徇名烈士所安螻蟻烏鳶
其致惟一矧於客死又奚足恤猗嗟包君字以達稱
魂其來歸享此嘗爇

明故江西臨江府同知細林楊君墓誌銘

君諱樞字運之別號細林華亭人也大父溥例授承
事郎父欽例授伊府典膳凡再世皆以善稱於鄉君

少穎敏年七歲出語驚其座人弱冠補郡弟子員丁
母憂明年大父卒而父病家又多外侮君晝出幹父
蠱夜讀書僧舍中率鄉晨乃巳戊子領應天鄉薦卒
業南廡爲祭酒張文定公司業歐陽文莊公所知又
師事涇野呂先生受毛氏詩名聞四方庚子丁父憂
甲辰謁選得福建延平府推官滿三載吏部以君治
行 聞贈父如其官母俞氏孺人踰年擢辰州同知
庚戌當考察會有讒君者調漢陽推官甲寅考績如
京師于時薦君者章凡七上吏部擬擢太僕丞不果
乙卯遷臨江同知議且召君而君以過勞得疾卒丙

辰十月二十有九日也距生弘治壬戌正月十有二
日享年五十五君爲學不專治章句務有以體諸身
見諸行事自爲諸生卽請於其父作祠堂以倡族人
居父母喪哀毀踰禮與其兄弟六人者處終父之世
未嘗有間言所著言史慎餘淞故述火餘雜著雅歌
譜傳心數學蒙養正訛等書若干卷皆足傳於世其
居官一以廉慎平恕在延平時河南饑民男女八十
餘人流入閩監司盡繫之將坐以盜公力爭曰世固
未有攜妻子以爲盜者遂得釋部使者使查盤它郡
獨不爲深文嘗直漳倅之誣倅德君乘君方飲以美

帶潛易君帶而去君覺立追還之在漢陽均賦役置
學田奪湖利之侵於豪右者歸之民民大畏以悅及
佐臨江郡境大旱禱彌月不雨諸役皆疲命君始攝
篆盡散遣諸役而獨齊被以居閱三日遂雨郡有驛
四巡檢司六故事歲留驛金千又令司以鹽之羨金
六十供郡費君一斥去不顧其治事恒以昧爽興至
夜分乃寢曰吾不忍自佚而病民嘗以除夕草清理
驛傳檄比成夜漏下四十刻矣卽出具服望闕稱賀
君旣生而癯又自奉薄而又勤於其政故年未及下
壽遂病以卒卒之日臨江民哭之哀歸觀過豫章猶

追而送之士大夫相與稱曰古之遺愛也嗚呼君於
學於政其諸過人遠矣配李氏禮部尚書至剛五世
孫以君貴封孺人繼以子豫孫貴封安人子八人長
卽豫孫舉丁未進士今官祠部郎以學行聞于時次
蒙孫萃孫升孫賁孫鼎孫井孫謙孫賁孫殤謙孫幼
其五皆庠生女二人長適庠生張觀叔次適黃稠孫
男二曾唯曾弘孫女六人初君計至京師祠部陸走
四千里匍匐扶襯還卜以丁巳年十二月十七日葬
蔡成涇任淇洪之原奉司業材君狀來徵銘予舊與
君同學於博士君僅長予一歲仕未達而卒予旣以

悲君然君有賢稱而又有子如祠部卽九泉可無憾也乃銘以慰焉其辭曰

位與名孰重輕兮君試遡乎權以程之身與子孰短長兮君試逆觀乎度以明之淇洪之原土厚水清兮君其永安乎徐享而迄成之

明故中憲大夫福建按察司副使卜君墓誌銘

往予視學浙中每喜得材賢士以需世用於秀水得卜君吉夫所爲文奇之已又見君卓然有志聖賢之學其在衆中稽經評史不苟爲異同或群議競發君

世經堂集

卷十七

十一

常持以靜徐出一語決可否莫不犁然當於道子則益喜指謂其守曰此當爲國器時予所望於君甚厚君嘗夢詣國子有泉湧上出遇故太宰恭肅周公謂曰泉上出及物象也汝志之覺而感奮遂自號監泉以貲入國子嘉靖丁酉領順天鄉薦明年舉進士授刑部主事慮囚江之南以平稱歷員外郎拜湖廣按察司僉事督下江防先是議者言自九江入楚斷黃漢岳會于洞庭江流彌亘千里而遙盜負濤浪行劫甚且攻剽州縣有司莫能制宜立上下江防置憲臣便詔以君往于是時事皆草創而地又當皖汝淮

楚之交吏各私其人法易梗而奸不易詰較之上江防尤難君旣按行謹俗去民所疾苦飭封守立里保審形勢定經防乃移文鄰壤爲陳一體之義及相成之利因與約關白勿違異按捕勿格失弗察者與同論令行期年群盜屏息部使者連上其治狀稍遷湖廣布政司叅議時征苗父弗克君至慨然曰兵貴先知其情以形合之知勝而後戰定策而後進是爲知兵否則以兵試者也因著征苗圖記總督張公得君說意合而君亦提湖兵會沅水上遂以平苗由是聲益起會海寇挾倭作難海所在皆震而閩爲禍首時

論推君才擢福建巡海副使客有問海事者君應曰倭所處聯絡海島譬如颶風掣電猝絕之難恃備在我耳夫禦外者必內固今不吾固而與倭逐是馳颶擊電鮮克濟矣乃趣駕至海上簡卒伍謹烽堠控險要大治樓船積糗糧以待賊又輯備倭圖記授吏士言甚悉初閩人多入海與諸夷市而漳泉爲甚縱弗禁則法廢禁嚴則奸民失利而倖亂往往導賊入或且攘臂群起以張賊勢最號難治而海禁兼筦利權下者旣多自敗其名潔廉者又率避弗肯爲以故海防日益廢弛獨君毅然任之旣修飭內治諸所興革

一切與民爲宜民咸安其政賊亦知有備終君任三年弗犯閩而屢寇甌會吳越間攻掠城邑數千里被其毒至動天下之兵不能制獨閩得君晏然君卒後二年乃始告警君生正德己巳 月 日卒嘉靖乙卯九月四日年纔四十七嗟乎以君所夢與予向所望於君皆不止此而今顧止此何也然君雖未竟厥施其所注措已足以立於世垂於後人可必無憾而憂時艱者方欲得材賢卓立之士如君者布滿天下以共圖弘濟乃復失君一人嗟乎予豈獨爲君惜哉君之先世居秀水思賢鄉有名璿者以財雄里

中璿生顒顒生周周生國子生宗洛能飲有氣槩不樂與世俯仰自稱長醉翁君考也以君貴贈刑部主事再贈刑部員外郎前母周氏母賀氏封太安人再封太宜人長醉翁生四子君居長次南京刑部主事大有次大觀次吏部考功主事大順刑部考功相繼舉進士君數貽書勉以樹立又貽書大觀爲言祖宗積累之難宜益謹飭引於長久故仕者咸著聲績處者亦恂恂以善聞云君名大同吉夫其字配周氏封安人再封宜人恭肅公弟之女先君卒子男四雨蒙皆庠生某某尚幼女三適吳江舉人吳承熙庠生沈

僑周家孫男一孫女三考功以學士董君狀來請銘予故知君而學士嘗與君同筆研予得其言益信所以望君者非謬而重惜於不果副也遂誌而銘之其詞曰
感涕檻泉厥流瀾瀾吾見其進未見其止才孰豐之壽孰靳之時耶命耶銘以訊之

梅淑人墓誌銘

詹事府詹事兼翰林院學士贈禮部侍郎諡文裕上海陸公厥配梅淑人既卒之六年其嗣孫官生郊走京師言曰臣先臣深幸獲遭逢 聖明日侍講幄歿

世經堂集

卷十七

十三

有葬有祭有贈有易名之典先臣死且不朽矣惟故事日講之臣率蒙恩推及其妻臣祖母梅以歲癸巳十二月十八日卒臣力未能葬也惟

聖主哀憐而賜察焉疏上 詔禮部賜淑人祭一壇

啓公墓以祔仍併祭公其年 月 日郊奉淑人葬

遂以少司成朱君狀請予銘予昔在翰林公方以文章有盛名於後輩少所許可而獨深器予先夫人之墓銘公筆也然則銘淑人予豈得辭按狀梅故上海鉅族有號太初處士者以隱德稱於鄉實生淑人淑人于歸時公猶未第能從臾公出讀書學舍遂領鄉

試第一舉進士改庶吉士授翰林編修凡門以内事
淑人一不以煩公公用是益得肆力於學天下士服
其文公居父母喪能相以禮及為祭酒謫延平淑人
朝夕慰解公甚至公以詹事致仕歸日具酒殺延諸
門下士與公遊公故達不以仕宦得失為意賴淑人
益安公卒淑人哭泣不欲生會子楫卒無嗣遽曰我
死誰與陸氏計門祚者遂輟哭疏於朝立郊為楫後
補公廕讀書成均又命郊割田五百畝助鄉人役出
金二千兩城其邑而自以金三百築邑之小東門其
曾襟智慮殆出丈夫右乃若賙鄰睦族儉勤等事在
婦人所可能者不道也淑人生成化丙申 月 日
卒時年七十八子一卽楫女一嫁思州推官瞿師召
亦先卒惟文裕公英偉磊落志在經濟官不竟其所
欲為淑人之賢復過人遠甚而不幸無嗣然有郊恂
恂足保其家茲又能乞卹典為淑人夫婦榮其亦可
以瞑矣銘曰

荷天之恩無孫有孫歸安乎魂

明故中順大夫邵武府知府致仕魯溪彭公

墓誌銘

往年予叔父谷陽府君求士之端嚴者以誨諸子得

魯溪彭公於諸生中而子因得與公遊于是時公年甫踰冠終日危坐讀書其有言必依於正其門人有小過必痛斥之至媿悚無所容乃已故予家兄弟出公門者皆務檢飭好義而徇名今國子生子進南京太僕卿子明其尤著者也公旣以文行蔚然負時望然苦數奇年四十始領應天鄉薦又五年成進士出知樂清樂清在東海之濱貴家勢族率事武斷或兼併以自利公一置諸法乃於小民則盡屏去煩擾與之休息於是不便公者日造爲謗語而小民則交口頌公真以爲父母當事者廉知其自謗不克行會中

丞秋崖朱公以巡視開府檄公勞師公心手計畫倉猝立辦庭中趨走吏士數百人竟席無譁者能聲尉聞徵拜南京刑部主事轉郎中遷知邵武鋤強植弱約已裕民視永嘉益勵而募兵除器外禦倭寇內制山賊綱條畢舉時有措置傍觀者多不能明其然已而莫不服其然巡按御史吉君澄首列公治狀于朝其後巡撫王公詢巡按樊君獻科相繼薦公將屬公重任而公患偏左遂乞致其任 詔有司俟病痊以

聞未幾竟卒嘉靖戊午十一月二十四日也距生弘治庚申七月三日享年五十九初公領郡有聲予謂

以公之賢遲暮而始達其積之既久則其發之宏固
宜及聞公病猶冀其再出故於章疏之間深致意焉
而不虞其不果副每與大夫士論當世之才未嘗不
喟然於公也公世家華亭曾祖諱文祖諱忠考贈刑
部主事東園公諱溶前母贈安人張氏母贈安人馮
氏馮氏方娠夢麟入其舍寤而生公故公麟名字允
禎又字太符曾溪其別號云配封安人周氏生三子
三女子曰汝達府學生汝毅汝讓皆治舉子業女適
刑部郎中袁福徵府學生吳伯光許汝升刑部在童
穉時公識其不凡許嫁以女後遂與公同舉進士人

世經堂集

卷十七

六

謂公知人汝達卜以巳未 月 日葬公 之原奉
都諫白灘張公狀請予銘墓予與都諫皆公所知厚
也都諫既按刑部所敘述爲狀又附以所親見二事
曰公嘗自外歸觸友人蒼頭所持蓋而仆折二齒友
人方駭責蒼頭公忍痛曰非彼不慎乃吾自不慎也
其後每語及齒痛卒無幾微見顏色赴試南都館人
有少婦盛飾挑公公罵却之明日卽移館舍以避嗚
呼觀人者必於其隱此可以知公矣銘曰

隱之不欺以爲人師謗之不知而民是綏其賢也猗
發之孔遲不竟其施其數也噫琢石幽墟銘以著之

其垂也永而

封安人陸毋沈氏墓誌銘

平湖陸君與繩初舉進士知濬縣部使者以治行薦于朝章累十餘上于時士大夫咸謂君必且官要近而君念其毋沈安人體素羸力請得南京祠祭主事迎安人於宦邸以色爲養又數延諸名士講學績文討論當世之務安人每竊聽而樂之諸名士聞亦益樂與君遊而相與頌安人賢以爲古歐蘇氏之毋無以過也後三年君遷儀制郎中奏績闕下奉安人歸其鄉比至當道有欲留君者泫然曰吾豈可以離

吾毋立上疏引疾去又二年嘉靖己未二月二十八日安人卒論者謂君能使安人以賢聞縉紳間又生能致其養歿及視其殮其可謂孝矣明年庚申君請於父刑部胥峯公將以九月二十七日葬安人於烏程菁山之原自爲狀請予銘墓予固習與君遊且深知其孝者也不可以辭按狀安人嘉善人高祖鏢祖葵連三世爲散官蔡尤稱長者父槩爲諸生以文行著聲邑人尊之曰平齋先生安人生數歲平齋口授之孝經小學時時舉古賢人淑女忠孝節義之事爲安人誦說安人輒能通其大指平齋嘗詘於有司意

不能無少望安人前解曰兒聞大人言應舉非本情
今顧當以得失介諸胷中耶乎齋驚曰誰教汝言此
者由是奇安人以歸刑部愛於其姑王淑人陸氏世
以財雄里中至刑部祖程鄉公始仕宦乃其家亦自
程鄉始落程鄉子光祿東濱公官益尊家之落顧益
甚刑部之始婚伯兄司空石涇公已舉進士居京師
諸兄弟亦次第宦學於外其所受父貲蓋不滿數百
金而又方讀書不暇治產業安人屏浮費節衣食夙
夜課耕與蠶以身先其下乃遂累奇贏闢田宅凡其
家吉凶之百需刑部自入胄監以至成進士舟車館

舍之費外及賑貸施予舉刑部所欲爲沛然無不給
然而刑部不與知也安人性孝哭其舅姑往往至毀
瘠治祀事寒暑必親見遺物輒泣不忍視平齋既老
而貧歲時致酒肉衣帛又爲豫其後事及一旦啓手
足無弗備者與妯娌處敬以和御子女婢僕凜然有
矩度門以內不聞急走疾呼之聲至其待親故則雖
甚貧賤詞色未嘗不溫也君與其兄弟或時籌論古
今於安人前安人以意評一二語皆簡而中每聞朝
政得則喜失則憂聞忠賢士摧什困窮色慘然若及
其難其以婦人而有丈夫之略又如此安人以君貴

封其生弘治癸亥正月十五日享年五十七子四人
長光祖與繩其字次光裕舉人次光祚己未進士後
其伯處士一齋次光宅縣學生後其伯刑部司務伍
塘女三人長嫁舉人陶九韶次嫁太學生包杞次嫁
舉人趙邦秋孫男五人基誠基忠基道基恕基仁女
六人皆幼予旣得與繩狀知安人懿行爲詳又見君
諸父太保東湖公言光宅之後伍塘也安人數囑善
視其庶子光宙至割田宅與之嗚呼其又可謂不私
其子矣銘曰

徂徠之山維松所生松旣稱材山亦以名古云有毋
世經堂集
卷十七
九
實生是子又謂觀毋惟子是視我銘安人其將曷云
請徵于古式永厥聞

明故南京禮部尚書贈太子少保諡文恪季
泉孫公墓誌銘

嘉靖庚申六月二十日南京禮部尚書季泉孫公卒
於位士大夫交相弔曰嗚呼失一君子矣其知者則
又交相弔曰嗚呼凡吾望公以有爲者今其已矣或
語及公姓字官爵輒相與泫然悲焉旣久而不能釋
也初公皇考忠烈公燧死寧庶人之變公時年十九
隨其二兄誓死赴讎會反者就縛乃奉喪以歸廬於

慕不飲酒食肉者三年遇忌日輒衰經以哭又善順
其母而嚴事其伯兄故公未仕以孝友稱及入官益
務修身慎行端重畏謹擇地而蹈曰吾敢以辱吾先
其與衆處正色危坐竟日不語笑尤不喜言人過然
於是非賢否甚辨以哲其問學未嘗自矜衒然於人
籍百家金石竹簡之傳無不窺於國家之典故問之
無弗知其臨財廉於世所窺伺以爲進取之會退避
若懦夫然然而勇於義故士大夫莫不服其德而其
知公者則深有望焉乃今不可作矣是誠可悲也公
先世居睦州後唐有廉吏曰三司使岳者卒葬餘姚

之燭湖子孫遂爲餘姚人七世至應時舉宋淳熙乙
未進士通判邵武軍倡道東南學者稱燭湖先生既
歿從祀孔子廟庭又五世至原舜爲山陰敎諭原舜
生銳以長子泓貴封監察御史其次子溥生新新生
忠烈

皇上褒死勸生推恩所自贈皆禮部尚書妣皆夫人
忠烈公娶夫人楊氏生三子伯堪由武舉第一人仕
至都督同知以孝旌仲墀仕至尚寶司卿公其季也
諱陞字志高季泉其號少嘗作越王臺弔古文見者
奇之嘉靖乙酉領鄉薦丁亥遊太學大司成今少師

分宜嚴公及上海陸公兩試皆首選名聲益聞四方
士多從學者乙未對 大廷進仁禮之說
上親為批定 賜第一甲第二人授翰林編修燭湖
既以理學聞及忠烈公炳然樹大節而公與伯兄又
以文武科相繼魁天下凡稱世家未有過焉者也
已以校勘

列聖御文五經二十一史遷右春坊右中允與修大
明會典清理軍職貼黃丙午主南畿試稱為得人己
酉遷國子祭酒其教先器識抑浮競為格二十二條
懸之屏間不以親貴關說有所左右諸士咸服辛亥
世經堂集 卷十七 十一

禮部右侍郎予自為洗馬與公遊而好也及公遷
禮部予實為尚書事必咨公以決其大者若 裕景
府之讀禮是也壬子
上即舊邸建元佑宮成以為

二聖重地安神重禮選於諸卿佐 命公奉敕以行
有司聞公至治廚傳甚具公一麾去不受襄鄧間方
役民治河公軫其寒飢作詩遺守臣諸役者遂得廩
於其吏今其詩鐫石存焉癸丑改吏部丁楊夫人憂
執禮如忠烈公時足跡不一入城市服除部使者薦
疏踵至徵拜禮部左侍郎未幾乃改吏部遷南京禮

部尚書陳較術業數事 詔嘉納之自近年來仕者
謂留都爲遠外每當往輒不樂公之南也獨自請以
行士大夫愈服公之高冀旦夕入相

天子獲視其所設施而竟不及召以卒予固素知公
則悲公者殆莫予若也公自少嗜書其在翰林終
日手一編絕不與他曹事及旣顯猶然爲文宗兩漢
詩宗杜氏所著述凡若干卷公旣素貧而諸子又胥
奉公教食指滋多貧乃滋甚未能刻也昔公與宮諭
華州王君友善王卒公亟收其遺文敘以傳矧人如
公者哉予不患其弗傳而獨慨其以衆所屬望者託

諸空言是予所以重悲也公生弘治辛酉三月二十
六日得年六十元配韓氏先公二十八年卒繼湯氏
以子鋌貴與韓贈封皆夫人子男五長鑰丙辰進士
今爲兵部職方員外郎次卽鋌癸丑進士今爲翰林
編修次鈞戊午舉人次鑛官生次鑲尚幼女一曰鑲
嫁少傅李公子中書舍人允鑰鋌韓夫人出鈞鑲鑛
楊夫人出鑲側室馬氏出孫男一女三俱幼計至鑰
等以卹典請 詔贈太子少保諡文恪 賜祭二壇

命有司治葬事嗚呼公之蒙恩於

上則可謂渥矣其竟足以塞予悲也否乎鑰等卜以

某年月日葬公燭湖之月山李公旣與公爲婚姻而
鑲與予子瑛又皆太保陸公壻也於是鑷等以李公
狀徵予銘予深悲公者重以親誼不得以不文辭銘
曰
奕奕龍山姚江之濱儲精炳靈是生哲人維是哲人
世其忠孝曰君制義曰父有教衆所競慕耳若不聞
矩步繩趨左右典墳日修其身以對君父不出戶庭
望隆公輔夢卜猶稽溘焉云亡有用弗竟識者之傷
惟彼淵泉或流或止澤被於物其究均爾我銘公行
百世有師用之竟耶其在於茲

封太孺人趙母許氏墓誌銘

封太孺人許氏者故封翰林編修平涼趙公諱玉之
繼室今御史中丞以仁母也父曰安東護衛義宮宣
母張姓太孺人生而儉朴不喜隨諸女婦施鉛朱爲
容年若干歸于翰林逮事其舅平谷丞及繼姑某某
待子婦苛翰林元配史繼配范皆不能得其意鬱鬱
以卒范卒時有子時元甫七歲某復虐之翰林以爲
憂太孺人至則日具鮮腍爲奉或時遇詬辱無纖毫
不平意見於色詞某遂悅遇時元亦有恩平谷卒某
盡私其宦資謀他適太孺人告翰林勿止曰毋貽子

孫患其薄於利而為趙氏遠計慮若此翰林以貢授
元城訓導置側室王生子時泰踰年太孺人始之元
城時中丞生數歲有異資而時元年十八太孺人為
娶段氏夫婦皆好逸每有煩言太孺人若不聞曰吾
幸有兒可教他何足介吾意其教中丞必先忠孝戒
毋得美衣食習宴安然事必以身先之糲飯練裳怡
然自足雖在疾病未嘗廢績絳尤惡巫覡佛老之說
或語及輒掩耳不聽故中丞之為人甘貧苦尚節義
辟斥世俗一切非聖之書而獨尊信六經語孟曰不
能行此不名為人嘉靖丙戌會試禮部第一讀書翰

林當道者忌之授戶部主事尋改兵部以論時事失
官薦者章數十上召為翰林編修兼司經校書又以
論職事失官庚戌有三患召為兵部主事屢抗逆鸞
幾為所殺出僉山東按察司事轉副使鸞誅拜僉都
御史巡撫山西又以論邊事失官前後凡三失官然
太孺人聞之輒喜曰吾兄丈夫也庚戌之召所親咸
以一勢重請太孺人諭止中丞太孺人獨曰國方有
急不卽赴可乎中丞居山東職領民兵戍薊門遣使
迎太孺人養所親又請母行太孺人曰吾不行無以
堅兒志故中丞仕於世不達然縉紳相與稱士有大

節緩急可倚仗及可望以必死者率歸焉太孺人素所教也嘉靖辛酉五月中丞奉太孺人遊於北園食至太孺人忽苦寒促歸卧遂以二十二日卒距生成化癸卯八月十二日享年七十九子三人獨中丞爲所出名時春以仁其字女一適郡學生張雲龍而側室王有女太孺人以嫁平涼指揮使王文生子思慎卒文素貧無屋以居王女攜思慎歸於趙太孺人長育之今襲指揮使矣孫男四守正守業時元出守巖守愚中丞出守巖俊敏有父風女四皆中丞出長適今兵部主事周鑑次適傅大叅子生員中二尚幼中

丞卜以是歲 月 日祔葬太孺人於翰林南山之塋屬鑑爲狀來徵銘予辱交於中丞三十年兩人者當少壯時所與往來多海內名士意氣相期許要不肯後於古人今漸次零落而其淪盟變塞以徇於世者亦間有之獨中丞不懼不沮若金之百鍊日以益精乃予亦自幸磨涅之餘其本來面目未盡喪也故雖仕處異迹而猶得兄事中丞太孺人於予有母道焉銘其可辭銘曰

趙家平涼編修發聞曰有女士自許來嬪厥德旣合爰生中丞維中丞公允武允文旣孝而忠爲時名臣

南山之原有翼其墻過者必式雖歿猶存

明故整飭蘇松兵備山東布政司右叅政兼副使贈光祿寺卿復菴任公墓誌銘

嘉靖癸丑倭夷寇東南于是時天下承平久吏與民不知有兵革賊至輒奔以潰復菴任公同知蘇州獨訓練所統民兵與力戰而躬介冑策馬以先之自書其姓名於腹背手足曰死戰吾責也雖然先人之遺體不可棄也茲用以識庶得收葬焉聞者咸感泣公又與其兵同寢食或連日夜粒米不入口或露宿草莽植立泥淖中未嘗稍自異所得俸直及諸上官之

牢醴悉分與其兵由是兵亦日奮敗賊於上海之八團方戰時寇拔劔擊公賴庖人某身蔽公以免公猶被三創既而守太倉以積勞疽發于背公子爾孝請公還郡就醫公叱曰吾誓不與賊俱生幸吾疾愈而賊滅當與若共太平之福否則有臣死忠妻死節子死孝而已歸以是語爾母吾不能與婦子對泣幃榻間泯泯以沒也會報賊至公遂裹瘡出海擊之怒濤如山南人習舟者皆震眩失色公意氣彌厲手劔麾舟師擣之賊大敗俘斬百餘未幾又敗之陰沙敗之保山敗之南沙賊望公旌旆輒遁去捷聞擢山東

按察司僉事整飭蘇松兵備甲寅賊犯蘇民爭走入城聚保而門鑰不得入民相抱號哭聲震原野公泣曰城池視百姓重等耳奈何棄之亟命啓門而謂其守曰賊入者某請任其責活數十萬人明日賊至以計敗之葑門乙卯賊復大至復大敗之斬首六十餘級 詔進公副使 賜白金文綺廕一子爲潞州衛左所副千戶世襲丁母趙夫人憂部使者及諸士民連疏乞起公 詔責公大義而特贈公母爲孺人以慰公公不得已受 命明年倭寇平疏乞終制 詔報可仍陞山東布政司叅政以旌其功又明年丁嫡母張夫人憂海內士大夫方望公服闋出爲 國家排大難立大功而公以前勞戊午 月 日疾作遽卒享年僅四十於是士大夫又莫不悲公用之未竟與 朝廷之失士而蘇松之士民則相與爲祠祀公給事中蘇人徐師曾請於

上贈公光祿寺卿然其父老猶相與言曰未足盡報公公諱環字應乾復菴其號世爲潞安人曾祖增祖仕父翔以公貴贈文林郎滑縣知縣公生正德己卯二月十八日幼警悟不凡年二十三舉山西庚子鄉試甲辰登進士知廣平以才優調沙河丁父憂改

滑縣沙河當南北之衝疲於役甚公首為省廚傳罷
誅求以次釋冤獄毀淫祠凡所興革必視民所便沙
民大悅其治滑如治沙語具二邑生祠記及德政之
碑辛亥徵至京師公之族有與宗室婚者故以例佐
蘇州配李氏先是公以其母歷於嫡不敢為妻請封
公歿爾孝以請始特封宜人子男二長卽爾孝郡庠
生次爾節今襲千戶女一適郡庠生仇承爵孫男一
可淳公為學先行誼尚名檢始為諸生時大書壁間
曰營私者無上虧行者無親又曰充海闊天高之量
養先憂後樂之心必如是始可以言士故其歷官清

世經堂集

卷十七

七

貞介特迥然異於時流而忠義之績在蘇松者尤著
爾孝等卜以庚申 月 日葬公栢塋之原予松人
也遂以督學江陵曹君狀為銘其詞曰

世每患多故而乏材幸有之矣乃復中道而摧嗚呼
人耶天耶且奈何哉銘于幽墟豈獨以識吾之哀

明故亞中大夫順天府尹近川查公墓誌銘

嘉靖辛酉閏五月十又六日亞中大夫順天府府尹
近川查公卒于官其子太學生志文以計聞 詔賜
祭一壇 命有司治葬事

上方慎重卹典卽於例合猶必問其人何如而公位

三品未滿一考獨獲被 恩數於是士大夫仰見

上之知公又惜公幸既受知而不及竟其用也公爲人凝重簡遠有黃子之度居常獨見謂長者耳及臨事確有定守不可以毀譽利害擾之使亂迫之使急至於進取之際澹如也當始舉進士時將疏請展墓或謂公宜少遲以需臺諫之選笑不應及予告還例授黃州推官尤公者雜至終笑不應其在黃州諸所讞鞫不視上官意爲重輕亦不以請託有所縱捨召拜禮科給事中上議舉 莊敬冠讀禮當事者惑傍言不敢任而以禮繁難行爲解公抗疏請簡其儀節

後踰年卒如公議行之楚世子弑其父有司未能正法公覈其報計日月之訛而律以春秋不嘗藥之義獄遂定轉戶科右給事中尋轉左會 朝覲考察疏

陳黜酷吏禁罰贖緩征科等若干條語多犯時忌竟以言謫雲南定遠典史復爲建寧推官遷刑部主事改吏部累遷至文選郎中盡取諸條例去其舛複裁爲一定吏不得爲奸有干請者溫詞遣之卒無所撓屈間見誚責居之如常或教以迎合謝不能而起遷太常少卿改大理少卿遷太僕卿所至舉其職遂尹順天涖事五日觸暑得疾以卒距生弘治甲子四月

十三日享年五十八耳公之先出於周以所食邑為姓唐時胥臣為司空師詰為柱國南唐時某為尚書宋時某為龍圖待制其後有號仁齋者自休寧徙居海寧之花園七傳至御史中丞約於公為叔父故公祖益封南京刑部主事又封奉政大夫而公父繪號雪岐生四子公與仲兄南京刑部郎中秉直相繼以科第起查氏遂益有聞公於為子為弟以孝敬稱撫其伯兄之孤志學志譽以慈稱自為諸生以文稱歷官以廉稱然未嘗白表襮與人處退然若無能者蓋其性然也配陳氏封孺人又以子志立貴封恭人子

世經堂集

卷十七

三

男三長卽志文次志宏領戊午順天鄉薦次卽志立舉丙辰進士今為禮部郎中女二長適徐善胤次適朱來旬俱太學生孫男五孫女二葬以年日墓在之原予自再入朝與公游而好也遂按禮侍石麓李公狀為銘諸幽曰

周原瓜瓞生綿綿因邑為姓惟查先司空柱國貴且賢尚書待制麻光聯入明火德蔚復燃中丞首奮公繼騫宛如玉潤停如淵勢不能懾欲不遷諫垣選部聲鏗然器可大受不承年我作銘詩瘞茲阡石不可朽名其傳

封一品太夫人楊氏墓誌銘

一品太夫人楊氏者贈少保兼太子太傅禮部尚書
武英殿大學士醉夢李公之配今少傅大學士南渠
公母也父諱諒娶於吳生太夫人而無兄弟太夫人
生七年吳氏卒哭泣不欲生諸母止之不能得其父
恚曰若欲我憂死者耶太夫人乃強食粥年十四歸
少保公為繼室及事其舅姑姑胡夫人治家嚴太夫
人每侍飲食立移時不敢退胡夫人嘗病太夫人與
少保公晝夜侍醫藥再閱月不就寢兩家人交稱曰
孝性又慈少保公元配俞夫人遺女甫四歲太夫人
愛之如已出及既嫁猶然至其老亦無不然其於婢
使未嘗輕有罵笞門以內雍如也少保公之卒少傅
猶業舉子太夫人時時稱舉少保公所為訓者以飭
少傅少傅學遂大成舉進士歷官至國子祭酒迎養
太夫人於京師嘉靖己酉

上慎簡輔弼之臣特命入內閣少傅歸覲太夫人且
謝且賀太夫人謂之曰往汝父客於文正謝公嘗為
予言文正之事君無小大無敢欺也其於持己無小
大無敢苟也今汝官文正也亦思與文正同其心與
行乎少傅固能尚名德遠權勢聞太夫人教應聲曰

所不惟母命之奉以事

天子者不可謂忠且不可謂孝

上數賜少傅金帛暨諸上方之珍品少傅以奉太夫人太夫人必呼萬歲然未嘗侈服食每指布蔬與諸婦曰惟此爲可久也及受一品封少傅奉 誥命歸太夫人北向拜呼萬歲者三又謂少傅曰

聖天子恩至渥矣吾一婦人何能爲報惟汝勉之少傅益自感奮常深夜計畫曰如是而天下可使安四夷可使附如是而庶幾無負於母氏之詔我者予與少傅同在翰林相先後入閣無逸之直又同廬舍每

世經堂集

卷十七

三十一

聞少傅云云輒低回歎服而因以知太夫人之賢舉以語縉紳莫不幸太夫人壽以成少傅之志也歲辛酉五月十日太夫人得疾卒少師嚴公偕予以聞

上命禮部賜祭者四併祭少保公者一 命工部給喪葬具兵部給舟車 遣大行一人護其喪員外郎一人治葬事而 賜少傅乘傳以歸蓋

上知少傅深故太夫人所被卹典備極隆厚而在縉紳則以少傅之去加悼恤焉嗚呼是可銘矣太夫人生成化甲辰三月十七日享年七十八子四人長本卽少傅次禾蚤卒太夫人每念之少傅爲立後且移

葬太夫人之墓側次樂南京太醫院判次采中書舍人孫男十三元允皆中書舍人見錦衣衛百戶兗後軍都督府都事兗中書舍人堯國子生冠魁寃充旭尚幼孫女五長適管大叅之子浙江都指揮僉事海次聘於宋中丞之孫某又次聘於大司寇楊公之曾孫某又次聘於陳學士之子某又次聘於陸刑部之子某曾孫男五少傅卜以 年 月 日葬太夫人之原先事以學士狀屬予銘予雅賢太夫人者不得辭銘曰

詩歌徽音母教則基不出戶庭功施于時猗太夫人

世經堂集

卷十七

三十一

木

少傅之母為女為婦德儀多有規於少傅俛俛色辭曰父有訓爾其承之少傅拜受以輔大政厥德乃心

協于

明聖聖曰嗟哉是實教忠生封歿卹恩數竝隆

之原有碑崇峙顯刻深書

天子所賜亦有信史金匱之藏名載列女燁其輝光人誰無母又誰無子歸然茲丘孝慈所視

明故太保兼少傅後軍都督府左都督掌錦

衣衛事贈忠誠伯諡武惠東湖陸公墓誌

銘

東湖陸公諱炳字文孚浙江平湖人唐宰相宣公之系也成化間有諱墀者選充錦衣衛小旗獻皇帝之國選充興府儀衛司總旗傳子松事

今上於藩邸

上之登極松以扈從功陞錦衣衛副千戶世襲典詔獄歷陞指揮使管衛事官至都督僉事卒贈都督同知則公考也公生而器宇軒豁志氣雄偉長才遠識文武兼備以舍人當都督公之存中嘉靖壬辰武舉授署所鎮撫贊畫薊州甲午春 犯冷背關公斬虜一人陞副千戶都督卒

世經堂集

卷十七

三

上念舊錄勞 命公世襲指揮僉事兵部合公武舉所得署級請於

上改署指揮使管南鎮撫司事戊戌

上謁諸陵 命公管衛事扈從以行其冬實授指揮使 賜誥命冊天禮成加俸若服色一級己亥春

上南狩駕至衛輝行殿火公親負

上以免由是

上謂公忠甲辰冬 命署衛印提督官校陞都指揮

同知乙巳春掌衛事丙午夏

太廟成陞署後軍都督僉事仍加俸若服色一級冬

以緝獲功陞都督同知 賜羊酒寶鏹又以功廕
冢子經爲署百戶戊申以 聖節恩加光祿大夫柱
國冬以緝獲功陞右都督廕次子紳爲總旗庚戌秋
犯京師警始聞當事者盡閉諸城門民走入保不
得啼號之聲載道公亟啓門以納凡活數萬人 遊
野薄城下城中惡少密相結乘時爲亂有期日將發
公廉知其狀縛魁渠置諸獄遂以無事冬以緝獲
賊功陞子經副千戶時逆鸞兼總京邊兵又多畜死
士將謀不軌公請於

上建射所選官校舍餘分番習射以陰制之鸞果憚

世經堂集

卷十七

三五

宗

不敢輒發辛亥以緝獲功陞左都督父以諸邊底寧
加太子太保尋又以緝獲功廕從子緒爲錦衣衛百
戶壬子秋鸞病死其所畜死士故嘗橫於京師及是
懼罪洵思變公爲好語安之而奏請還諸各鎮京
師遂安未幾鸞逆謀洩 詔剖其棺斬首傳示九邊
公分遣旗校授方略盡獲其黨時義侯榮等以置諸
法義榮本與 通當是時非公幾北走 矣癸丑

詔追論公功加少保兼太子太傅歲支伯爵祿贈曾
祖軾祖堦考都督公如其官曾祖妣舒氏祖妣王氏
前母張氏母范氏繼母李氏皆一品夫人自庚戌之

變 數垂涎京師之南關

上用羣議作重城 命公提督公陳拓城基建樓關
集夫役增工食嚴賞罰給醫藥等六事

上皆從之而公於督視尤竭心力城成加太保廕一
子爲錦衣百戶其秋 召直無逸冬兵部以諸邊捷

聞加祿米歲五十石乙卯陳鋪戶甲役之累言甚懇
詔都察院如公言釐諸弊端民費大省丙辰 賜諸

進士宴于禮部 命公列坐文職二品之次丁巳奏

發中官李彬貪黷恣橫諸不法狀彬時方幸人皆爲
公恐賴

世經堂集

卷十七

三十一

七

上聖明捕彬及其黨付詔獄中外又皆動色以喜故
事錦衣諸所及二鎮撫司有管事官有帶俸官公疏
請汰管事官之年老有疾者俾帶俸閒住以清冗員
而其帶俸官十年以上者給半俸十五年以上者量
給俸三之一二十年以上者月給米一石以省冗費
又請令輸粟授總旗者不得註錦衣衛以杜冗濫
詔皆從之秋以 聖節恩加兼少傅 賜諭曰以公

兼孤云戊午春 攻圍大同右衛致仕叅將尚表率

諸將士固守而城中乏食勢不能支會千戶張大用

奉 命逮總督楊順還具以告公公疏聞

上諭公選官往勞而語總督江公東急運謀救之公復遣大用及百戶謝麟以行大用等至宣

上德意會江公所市芻糧亦集大用等因與江公及其鎮巡選調士馬會於左衛城歃血盟諸將以四月十五日鼓行而西 懼遁去遂以其夕入右衛說者

謂遲五日則右衛不守矣已未夏以先夫人葬承天乞祭葬 詔特允之秋以 聖節恩加祿米二百石

庚申十二月十一日暴卒距生正德庚午十月十五日享年五十一公爲人忠義正直視國家之事苟可效尺寸必竭其力禍福生死無少惕於心見有奸於

世經堂集

卷十七

三七

法亂於紀者疾之如讎搏擊無少避故觀其持已行法若剛不可犯而介然與物無情者然其事繼母能以色養待其弟太僕少卿煒友愛周至惟恐拂其情施於朋舊拯難矜急有其人意望所不及與自謀之所不逮者尊賢禮士問遺造請不計有無不憚寒暑有危急務保全之其謙恭委曲視前所爲若兩人然蓋公讀書明理道故義之所激千萬人必往而禮之所在輒異懦如書生非獨其天性然也於是

上詔有司曰炳予忠國之臣贈忠誠伯謚武惠 賜祭十六壇齋糧麻布五十石疋 命工部具棺造塋

兵部廕子繹爲錦衣都指揮僉事已又念繹幼命
掌衛事都督朱公保視之并經紀其家事公雖不獲
享遐壽而其受恩於

上則雖簡冊所載未之前聞於此見忠國之報矣公
初娶吳氏繼黃氏張氏趙氏子男三長經次紳俱先
卒次卽繹次綵公卒後側室李氏出女五長嫁成國
朱公嗣子時泰次嫁少師嚴公孫錦衣指揮僉事紹
庭次受子子瑛聘又次受宗伯孫公子鑲太宰吳公
子綬聘孫女一嫁錦衣南鎮撫司都指揮僉事袁憲
文公存時嘗卜地於朝陽關外三里屯至是諸姻故

合而謀曰公之意不可違也乃以辛酉二月初七日
葬公而遷張夫人以柩子素與公相期以忠孝公之
建射所捕逆黨解右衛圍子多與謀而予孤危之迹
又數賴公以免患故公之卒也予哭之慟退而爲之
銘其詞曰

宣公之後有人崛起旣武旣文以佐 皇明有狐在
城莫之敢睨時其出穴一矢而斃有虎負隅莫之敢
櫻弱其翼牙卒死以烹近旣寧止乃謀於遠翊贊

廟謨重城以建內旣綏止爰及邊方解圍右衛外患
以攘其將有爲奮不自顧退接士友曲中矩度其在

用法根挾枝披撫視孤斃又何憇慈猗嗟陸公克世
其德百身莫贖我悲奚極朝陽之原有墳隆然銘以
揭之過者式焉

明故太子少保禮部尚書兼翰林院學士掌
詹事府事贈太子太保諡文簡孫公墓誌

銘

公諱承恩字貞甫毅齋號也其世曰孫氏出晉御史
大夫康宋之南自汴徙居武陵元末有為上饒錄事
諱伯英者避方國珍亂始來華亭再傳至士達生子
璵領宣德乙卯鄉薦署廣信訓導訓導生衍舉成化

世鑑堂集

卷十七

五

札

戊戌進士仕終延平知府郡人為立遺愛祠自延平
而上凡三世皆以公貴贈太子少保禮部尚書兼翰
林院學士妣皆夫人其生曰成化辛丑十二月十日
卒曰嘉靖辛酉八月二十一日享年八十一其配曰
吳氏封孺人累贈至夫人繼娶楊氏封夫人所子兄
之子曰詹事府主簿克紹側室錢所生子曰前軍都
督府都事克弘女三壻曰太學生陸鑄黃相戴邦傑
孫男五曰生員某某其俱克紹出曰昌福尚幼克
弘出其葬曰嘉靖癸亥十二月十六日墓在蟠龍塘
祖塋之右其歷官曰公舉正德辛未進士改翰林院

庶吉士授編修當是時權貴人數亂政公歸臥於家者七年

今皇帝卽位始拂拭其衣冠告所知曰吾可以出矣及登朝以選使安南又久之以纂修明倫大典遷

左春坊左中允充經筵講官兼講大學衍義連主南

北畿鄉試遷南京翰林院侍讀學士皇太子生召

爲詹事府少詹事兼侍讀學士禮部右侍郎缺銓司

舉陸文裕公及公以聞詔特用公仍兼少詹事侍

讀學士充經筵日講官數遣視牲南郊陪祀

帝社稷代拜永明祭先師於太學眷禮出尚書上

轉左侍郎改吏部左侍郎掌詹事府事同修玉牒

充會典副總裁主考會試遷禮部尚書仍掌府事改

掌部事兼掌府事會有忌者力引疾以歸然

上每念公見謂可信任逾年召掌詹府加太子少

保疏請皇子講讀不報遂以疾再疏乞致仕詔

賜馳驛并許以克弘侍行凡居家十年卒其卹典曰

自聞喪至於葬賜祭四壇遣中書舍人梁孜治

葬事贈太子太保諡文簡又將廕其孫其行曰公事

親孝始延平以祈雨得疾公每值有祈雨者輒感額

不欲聞母阮夫人以上元日生公歲張燈爲壽夫人

歿不復燃一燭撫其兄之子克嗣孫昌祖族之孫今
鄉進士友仁及焦氏之寡婦母族之孤嫠朋舊之貧
且病者咸有恩於辭受無所苟然生而直項寡言與
人交雖所知厚自一揖外不能致款曲卽有所德於
人亦不能懇懇爲謝或說以名位可智力取輒辭曰
有命又或強之面發赤不復荅聞有毀已者笑曰吾
固無愧於心間受人欺輒又笑曰誠不意乃爾於書
無所不窺及對賓友一不以資談論故在士大夫之
賢者罕克知公而其不肖者因謂公易與思有以摧
沮凌躐之獨賴

上識公醇謹遷轉召用多出 御筆公遂得至貴顯
上在位久明於人情凡大臣請告者率見疑獨公以
誠見諒得以恩禮去位自少至於老手不識握算亦
未嘗一問米鹽細小物價之盈縮故公年踰八十乃
其心渾然赤子之初其制作曰在

武宗時有修德應天賦

上之登極有正始箴有鑒古韻語

上南狩還有大孝頌皆志存勸戒雖或取忌取謗爲
之不疑垂卒有遺表曰慚負國恩虛生人世捐殞已

矣銜結茫然惟

聖躬康壽天曆彌長則臣死之日猶生之年讀者以爲公於愛君至死不替有古大臣之心而其他若使交紀行稿使郢稿集古像贊易卦通義女訓灤溪草堂全集以文章稱雄於世者未暇論也予後公舉進士十年猶及與公同在史館宮僚之選予自江西副使獲隨公升于朝後公視篆詹府而予繼爲禮侍公歸予實代爲禮書公之再起予忝在內閣與公處甚久稔知公之爲人蓋真所謂長者故公之歸予爲文贈之又以文壽公八十及既卒又合諡法所謂博學好問一德不懈者諡公而茲又按大叅鳳峯沈公狀序其事之大者以銘于幽銘曰

世經堂集

卷十七

四二

世衰道微文乃盛孔子因之思先進公生業文獨質勝口無甘言色不令紛華滿前一無競羣趨衆謹持以靜人莫知公

主明聖南宮詹府佩兩印旣歸復召親錫命行且相公公則病吁嗟有德用未竟餘光燁燁照史乘易名文簡行允稱

明故廣西叅議左山顧公墓誌銘

嘉靖壬戌九月三十日廣西叅議左山顧公以疾卒于家階悼故舊之凋落也才賢之不可以復作也自

原帥為文祭公於是公之弟大叅豫齋公書來曰中
孚不幸喪吾兄而吾兄幸辱哀於吾子宜有以圖其
不朽者乃自為狀授公仲子正倫以示予曰顧氏出
吳丞相雍逮梁黃門侍郎野王始占籍華亭入國
朝有諱景陽以能詩播者吾五世祖也永樂初有諱
彥迪以儒士佐英國公幕者吾高祖也弘治正德門
有諱斌仕為興寧知縣以文行稱靜虛先生卒贈刑
部主事者吾父也吾兄生而吾父竒愛之遣受業於
尚書文傳顧公文信之門故多士然獨以國士稱吾
兄卽諸先輩讀其文莫不愧且屈也三十二領王

德丙子鄉薦後十年登嘉靖丙戌進士為南京刑部
主事丁吾父憂服除改刑部故事有本科以看詳諸
司之章奏非文學政事兼者莫克與其選尚書謀於
衆咸曰惟吾兄宜於是吾兄專其事者三年會吾母
宜入病醫謂弗宜其水土吾兄曰迎養以為親也
奈何反以病吾親立上疏乞改南復為南刑部逾年
遷儀制郎中又逾年遷山東按察司僉事嘗行縣發
其粟賑饑吏曰粟必白撫按俟報乃得發吾兄叱之
曰民且死何報之俟青徐間賴以活者數千人縣又
嘗苦蝗檄令尉曰及蝗始生易撲滅也蝗卒不能為

災有 詔發銀礦以佐國羣盜競窺焉撫按曰非顧
僉事莫能辦此人或為吾兄危吾兄曰誠率之以無
私而行之以法孰敢干吾紀者已而果帖然屬吏有
以賄聞而見徵者請於撫按卽以其事白之銓曹銓
曹械歸其人於是羣情甚快而黨惡者大不悅秩滿
遷廣西歸覲吾母一見愀然曰報母之日短矣疏乞
終養明年吾母捐館舍而辛丑竟為怨者所中致其
仕吾兄為人剛明而直諒其中有所懷未嘗不發於
言乃其所言者中固未必有也其所問學在於用世
故其政隨所至有聲而其形之制作燦然可觀者特

其緒餘也其處宗婣事必從厚而於孝友尤篤至於
老不衰也其襟度夷曠不以世故戚戚於中題其月
曰洪厓堂名其詩若文曰洪厓集蓋庶幾古所謂
者也然而仕不竟其志壽不能及七旬其命也夫吾
兄諱中立字伯從左山其號生弘治乙卯十月三十
日享年六十八配朱氏贈宜人無出繼娶吳氏封宜
人子男四長正誼次卽正倫次正心正時俱生員女
三長適右都御史上海潘公之下今南京工部主事
允端次適巡撫河南都御史 公之子生員中

錫汝潘 吳科 捐給事中同邑楊公之子生員允雋孫

男二嗣科嗣賢孫女二長受李氏聘次尚幼葬以癸亥十月八日墓在 始吾父官興寧中孚幼

且多病其撫且教之以至成立翳吾兄之功吾父罹寇變中孚時知萬載不卽聞吾兄在南都棄其官奔以還而吾母之卒吾兄時在侍故吾二親之含殮中孚得無憾焉者翳吾兄是賴至於中孚之家居朝夕所仰以寡過者亦惟吾兄是師而今已矣此吾之所以重悲也子讀竟顧謂正倫曰子自未冠獲交於尊公凡茲所稱皆予所知卽予不能有所張大揚詡其又忍使弗傳遂誌而銘之曰

世經堂集

卷十七

聖

才無徵耶燁其休聲才必徵耶不竟於聞在我者才用我者人其徵與否又奚足云狀公者弟銘公者史信于百世徵其在也

封通議大夫吏部左侍郎兼翰林院侍講學士靜菴郭公墓誌銘

靜菴郭公以嘉靖癸亥三月三日卒于家其子太子少保吏部尚書兼翰林院學士朴以聞 詔賜公祭加等遣官治葬事而 命太宰馳驛以還蓋異數也太宰哭謂子曰朴奉吾父之教以幸有今日顧

主恩未及報而吾父則已不可作惟誌其流光委祉

之實傳之後來庶吾父為不朽而朴時一誦焉亦或於圖報

聖主而光顯吾父者庶幾其有助也因再拜以銘請予故與太宰友善不可辭按狀公河南安陽人諱清字靖之靜菴其號曾大父恭領鄉薦知真定之藁城大父銀父瑄以貢主魚臺簿公既寡兄弟而主簿自魚臺歸家又甚貧須公以養故公少廢學耕於洹之野有田五十畝屋六楹至不足給衣食而公襟度夷曠篤於義而輕於財每與人飲連日夜無勦色人有急傾所有資之不少吝初封翰林編修又封通議大

夫吏部左侍郎兼侍講學士又親見太宰握銓持衡進退黜陟天下士者踰年視昔耕于野貴賤殊絕矣乃服食用器無所加於前數步行里閭間非素相識者不能知為太宰父也故人尤以為盛德嘗就養宦邸會太宰主考南畿鄉試分校禮闈鑰門謝客訖事乃已太宰既在銓司數迎公養不赴鄉人入都者或索公書為贄輒謝曰吾方飲酒不暇為煩語吾兒勉事

聖主毋以吾為念先是太宰拜掌銓之

上賜手詔曰慎評庶職先之守令于時天下翕然想

見

上圖治之心而竊懼其難副及太宰考察內外羣吏
注授百僚賢不肖不爽毫髮天下又翕然頌太宰真
能舉其職而公方康寧健強相與樂公之壽庶幾太
宰之政有成而遽以憂去於是凡屬望於太宰者又
相與歎惜於公之卒至涕淚而不能自禁也公生弘
治癸丑九月一日享年七十一配李氏封淑人子男
四長卽太宰次樞次楨俱國子生楨先二年卒次棟
舉人女二長適庠生鄭中次適典寶正徐瑛孫男十
人煥焜俱庠生燦官生煊焯熠餘尚幼女十六人壻

世經堂集

卷十七

墓

表

馬緒徐佶俱國子生李喬枚張焯庠生餘亦幼曾孫
子二人曾孫女一人公葬以 年 月 日墓在洹
水之陽銘曰

惟民望治甚於渴飢幸旣得止又懼失之故天下以
太宰而樂公之壽及公之卒復以太宰之去而悲穆
穆太宰

天子所知尚遘其來以慰邦人之思

明故中憲大夫四川按察司副使春山富公

墓誌銘

春山富公以正德庚午與予叔父谷陽府君同舉應

天鄉試公時年二十餘方面豐頤瑩如玉樹而意氣
閒雅飄逸子以童子從旁窺視之竊敬且慕焉後子
稍長間以府君命侍諸先輩飲公待子獨厚辛巳公
舉進士拜工部主事摧木荊州閱二年子亦遂辛未
竊又五年公以服闋改刑部會子免先少師喪復官
翰林益得從公游故於公習焉公才高其於爲政初
若不經意而所措注詳練精密卒莫能易之初試於
荆荆故利數司推務者往往遭怨謗以去公條所不
便於商及舊制所宜復者爲奏罷行之聲望蔚起自
刑部郎中出知重慶盡取民所出賦役哀以爲籍而

事爲之限使民自輸於官奸人至環視不能有所乾
沒自重慶遷副使飭兵建昌鑿山堙塹起海塘堡爲
陸道數百里以避瀘水之瘴先是建昌摧井鹽以餉
兵其後鹽丁逃而兵據有鹽井之利於是稅廢而餉
存當事者雖知其然然莫敢奪公令計所當受餉與
鹽稅相准費乃頓紓故時論者以公爲通才公又有
定力於毀譽得失之際能無所動其心在刑部時侍
御南江馮君以論汪鉉下獄公爭以爲無死法鉉銜
之出守遠郡公不怨尤及道江漢下瞿塘歷巫峽峨眉
青城諸山顧其僕笑曰吾嘗數夢家萬山中茲豈

偶然也在重慶時蜀王與都司劉永昌訐奏不法若
干事 詔遣給事中御史案之蜀旣大藩而劉又素
兇狡二人以檄公或謂公勿往公不應至則一斷以
法僅十日獄具奏報可在建昌發屬吏之貪酷者其
僚以為請弗聽則讒公巡按御史御史惑之會當大
計天下吏公卽棄其官歸所過登眺詠歌若以遷至
旣抵家不治生產數出遊湖山經月乃返返未月又
買舟以出自少至老未嘗一日廢觴詠卽獨處亦未
嘗不怡悅與人處未嘗不盡人或負之雖至再三終
不校蓋公多讀書尤喜談神僊氏之說其所自得者

深矣公諱好禮字子超春山其號厥初洛陽人從宋
南渡始家華亭曾祖禎壽官祖綱父洪洪以公貴封
工部屯田司主事贈副使母丁氏封太安人贈恭人
配張氏累封恭人子男三長于文光祿寺監事次于
德于仁皆庠生蚤卒女三長適貴州提學副使莫如
忠次適監生張承祖又次適禮部郎中白啓常孫男
一可大郡庠生于文出女二于德于仁出曾孫二俱
幼公卒以嘉靖辛亥 月 日距生成化丙午某月
日享年六十六予旣習與公游而公之卒也命于文
必請予銘予往時嘗語後進云士大夫子當以于文

孝謹爲法及是于文來致其父命予不得辭銘曰
有廢必舉有爲必成惟材之弘外無役於形內無戚
於心惟養之深生也予知歿也予銘惟文永傳以慰

幽冥

張母朱孺人墓誌銘

張母朱孺人旣卒之十閱月嗣子封兵部主事朝封
率其弟朝桂庶弟朝奎啓其父大名通判鶴沙公之
墓奉孺人合葬焉先事以孺人從子國子司業大韶
狀屬階爲銘階孺人壻也不敢辭然階聞之銘也者
以昭德而示後也孺人之德狀所載者多矣詳於細

不若著其大者之簡而傳也乃掇其二端以刻于石
曰凡勤儉敬恭之節在貧賤之人非難而在富貴者
爲難其薄於利而篤於義在男子且難而在婦人女
子其難可知也惟孺人於封御史慎恒公爲曾孫於
按察副使鈍菴公爲孫於南京禮部尚書茲溪公爲
長女其歸張氏於南京刑部尚書莊懿公爲孫婦於
鶴沙公爲正室於宣城伯之夫人爲弟之婦而其子
二人朝封以子貴封兵部主事朝桂爲國子生孫仲
謙舉進士爲兵部武庫郎某某皆爲博士弟子
曾孫某某亦以文學繼諸父以游於郡之庠女長嫁

爲千戶顧 妻有子承勳爲河南都指揮使掌司事
次適階封一品夫人有子璠爲太常少卿琨爲中書
舍人季適府學生董容大最華亭之仕者尚書五人
雖人品高下不盡同而孺人之父與夫之祖居其二
爲司業者三人而夫人之從子居其一其以侯加少
保總

天子之六軍者一人以少師居政府率百官左右

天子者一人而皆於張爲壻則故宣城伯衛公綽暨
階是也孺人之富貴其亦可謂盛矣然孺人身常衣
布素至老猶手紡績治木絲作布悅不間寒暑與內

外親及鄰之嫠嫗處高下厚薄一視禮所宜未嘗有
傲色非性於勤儉敬恭者耶自邇年來天下靡然趨
於利窮晝夜之力圖其所不當得至蠹倫理敗風俗
不少顧卽士大夫能自拔於流俗者鮮矣孺人少愛
於母秦秦嘗與之珠環及茲溪公側室之子生毋索
環曰此汝祖所寶當歸諸其孫孺人出之無難色鶴
沙公初贅於朱孺人以長女理家政於朱之金帛分
毫無所私後從鶴沙公居新橋而茲溪公輯內室獲
遺金及簪珥數事檢其籍則孺人理家時所留也以
歸孺人孺人竟不受非篤於義而薄於利卓然出土

人之表者耶嗚呼古之君子以一言一行之善至名
天下聞後世歷數千百歲不衰孺人之賢如是是誠
足以傳矣孺人生成化戊戌六月二十日卒嘉靖癸
亥正月十一日享年八十六葬以卒之歲十一月十
一日墓在車墩之原銘曰

善不必多惟其絕殊福不在身視其遺餘孺人母張
而出於朱蔚其賢聲光兩尚書慶積澤流由張暨徐
子婿甥孫榮暉燁如猗嗟孺人德與福俱有徵賢者
其在茲歟

